



29 may 2025 yil.

09/02-07-18-7384-son

Тошкент туманлараро иқтисодий суди

Давогар:

Ўзбекистон Савдо-саноат палатаси

Палата аъзоси манфаатида:

“Pronto Textile Group” ҚК МЧЖ

Тошкент вилояти, Чиноз тумани,  
Нафис МФЙ, Самарканд кўчаси, 2-уй.  
СТИР: 303 922 812  
тел: 71 253 10 24

Жавобгар:

“Business Tex” МЧЖ

Тошкент шаҳар, Учтепа тумани,  
Кўкча дарвоза кўчаси, 581-уй  
СТИР: 308 425 524

### ДАЪВО АРИЗА

(Қарздорликни ундириш тўғрисида)

«Pronto Textile Group» ҚК МЧЖ (кейинги ўринларда – даъвогар деб номланади) ва «Business Tex» МЧЖ (кейинги ўринларда – жавобгар деб номланади) ўртасида 21.10.2024 йилда 01-УКП-сонли матони ишлов бериш пудрат шартномаси имзоланган.

Шартномага кўра, Даъвогар Жавобгарнинг топшириғига биноан ўзи ишлаб чиқарган трикотаж матони кесиб, ипак экранли босма нақшни кесилган трикотаж матога ёпиштириш, маҳсулотни Жавобгарга топшириш, Жавобгар эса шартнома шартларига мувофиқ маҳсулотни қабул қилиш ва тўловни амалга ошириш мажбуриятини олганлар.

Шартноманинг 2.1.-бандига кўра шартнома умумий суммаси ҚҚС билан бирга 2 500 000 000 сўмни ташкил этади.

Ўзбекистон Республикаси Фуқаролик кодексининг 354-моддаси 4-қисмига мувофиқ тарафлар ўртасида етказиб бериш (ҳом-ашёни) шартномаси ва пудрат шартномасининг элементларини ўз ичига олган аралаш шартнома имзоланган.

Даъвогар томонидан шартнома шартлари тўлиқ бажарилиб, Жавобгарга ҳом-ашёни қайта ишлов бериш ва етказиш каби хизматлари кўрсатилди.

Даъвогар шартномага асосан ўз мажбуриятларини тўлиқ бажарганлиги, Жавобгарга 1 941 421 003,20 сўмлик маҳсулотлари етказилган, ушбу ҳолат ҳисобварақ-фактуралар билан тасдиқланади.

Жавобгар томонидан жами 1 829 589 377,96 сўмлик пул маблағлари етказилган маҳсулотлари эвазига Даъвогарнинг ҳисоб рақамига туширилган, лекин 111 831 625,24 сўмлик миқдорни тўлашдан ҳанузгача бош тортиб келмоқда.

Фуқаролик кодексининг 638-моддасига кўра агар пудрат шартномасида бажарилган ишга ёки унинг айрим босқичларига олдиндан ҳақ тўлаш назарда тутилган бўлмаса, буюртмачи пудратчига шартлашилган ҳақни иш тегишли тарзда ва келишилган муддатда ёхуд буюртмачининг розилиги билан муддатидан олдин бажарилиб, унинг натижалари узил-кесил топширилганидан кейин тўлаши шартлиги кўрсатилган.

Шартноманинг 2.4-бандига кўра якуний ҳисоб-китобни, ишларни қабул қилиш – топшириш далолтномаси имзоланган кундан бошлаб 10 календар кун ичида тўлаши назарда тутилган. Мазкур асосга кўра Жавобгар ҳозирги кунда бажарилган ишлар эвазига ҳисоб-китобни тўлиқ амалга ошириши мажбур, лекин зиммасига олинган вазифаларни бажаришдан бўйин товламоқда.

Ўзбекистон Республикаси Фуқаролик Кодексининг 638-моддаси 1-қисмига асосан агар пудрат шартномасида бажарилган ишга ёки унинг айрим босқичларига олдиндан ҳақ тўлаш назарда тутилган бўлмаса, буюртмачи пудратчига шартлашилган ҳақни иш тегишли тарзда ва келишилган муддатда ёхуд буюртмачининг розилиги билан муддатидан олдин бажарилиб, унинг натижалари узил-кесил топширилганидан кейин тўлаши шарт.

Бугунги кунга қадар жавобгар 111 831 625,24 сўм миқдоридаги тўловни кечиктириб келмоқда.

Ўзбекистон Республикаси Фуқаролик Кодексининг 333-моддасида қарздор айби бўлган тақдирда мажбуриятни бажармаганлиги ёки лозим даражада бажармаганлиги учун, агар қонун ҳужжатларида ёки шартномада бошқача тартиб белгиланган бўлмаса, жавоб бериши белгиланган.

Ўзбекистон Республикаси Олий Суди Пленумининг «Ўзбекистон Республикасининг «Хўжалик юритувчи субъектлар фаолиятининг шартномавий-ҳуқуқий базаси тўғрисида»ги Қонунини иқтисодий судлар амалиётида қўллашнинг айрим масалалари ҳақида»ги қарорининг 10-бандига кўра умумий қоидага кўра, қонун ҳужжатлари ва шартномада бошқача тартибда жавобгарлик назарда тутилмаган бўлса, шартнома шартларини бажармаганлик ёки лозим даражада бажармаганлик (шартнома интизомини бузганлик) учун Қонуннинг 25-32-моддаларига асосан жавобгарлик қўлланилади.

Шартноманинг 6.6.-бандига кўра жавобгар тўлов муддати бўзганлиги учун, ҳар бир кун учун тўланмаган сумманинг 0,1% миқдорида, бироқ шартнома суммасининг 50%дан ошмаслиги белгиланган.

Бироқ, Ўзбекистон Республикаси Олий Суди Пленумининг 04.03.2002 йилдаги “Ўзбекистон Республикасининг «Хўжалик юритувчи субъектлар Фаолиятининг шартномавий-ҳуқуқий базаси тўғрисида»ги Қонунини иқтисодий судлар амалиётида қўллашнинг айрим масалалари ҳақида”ги 103-сонли қарори 12-бандига кўра Қонун 32-моддасининг иккинчи қисмида назарда тутилган пеня ишлар ва хизматлар ҳақини ўз вақтида тўламаганлик ҳолларида ҳам қўлланилади. Пенянинг миқдори шартнома баҳосига эмас, балки бажарилмаган мажбуриятлар қисми (тўланмаган ёки кечиктирилган тўлов суммаси, бажарилмаган ишлар, хизматлар суммаси)га нисбатан фоиз миқдорида ҳисобланади.

Шунга кўра Жавобгар Даъвогарга тўлаши лозим бўлган пеня миқдори 20 353 354,84 сўм ташкил этади.  $(01.12.2024 - 01.06.2025 \text{ йил} = 182 \text{ кун учун: } 111\,831\,625,24 \text{ сўм} * 0,1\% * 182 \text{ кун} = 20\,353\,354,84 \text{ сўм})$

Ўзбекистон Республикаси Фуқаролик кодексининг 236-моддасига мувофиқ мажбуриятлар мажбурият шартларига ва қонунчилик талабларига мувофиқ, бундай шартлар ва талаблар бўлмаганида эса — иш муомаласи одатларига ёки одатда қўйиладиган бошқа талабларга мувофиқ лозим даражада бажарилиши керак.

Ўзбекистон Республикаси “Хўжалик юритувчи субъектлар фаолиятининг шартномавий-ҳуқуқий базаси тўғрисида”ги Қонунининг 7-моддасига мувофиқ хўжалик шартномаси тарафлари тузилган хўжалик шартномалари бўйича зиммаларига олинган мажбуриятларни ўз вақтида ва тегишли тартибда бажаришлари шарт.

Даъвогар шартнома бўйича ўз мажбуриятларини лозим даражада бажарганлиги даъво аризага илова қилинаётган ҳужжатлар билан тасдиқланади.

Шартномада низони судга қадар ҳал қилиш тартиби белгиланганлиги сабабали, Даъвогар низони судгача ҳал қилиш мақсадида 25.12.2024 йилда талабнома юборган бўлсада, жавобгар талабномани эътиборсиз қолдирган.

Шунингдек, Палата томонидан ҳам низони судга қадар ҳал қилиш жараёни ўтказилган бўлсада, жавобгар ушбу жараёнда иштирок этмади.

Ўзбекистон Республикаси Фуқаролик кодексининг 236, 354, 638-моддалари, Ўзбекистон Республикаси “Хўжалик юритувчи субъектлар фаолиятининг шартномавий-ҳуқуқий базаси тўғрисида”ги Қонунининг 7 ва 24-моддалари ҳамда ЎЗР ИПКнинг 149-153-моддалари, ҳамда “Ўзбекистон Республикаси Савдо-саноат палатаси тўғрисида”ги Қонунининг 21-моддасига асосан суддан,

### С Ў Р А Й М А Н:

1. Даъво аризани давлат божи тўловисиз иш юритишга қабул қилишингизни.
2. Жавобгар «Business Tex» МЧЖдан даъвогар «Pronto Textile Group» ҚК МЧЖ фойдасига 111 831 625,24 сўм асосий қарз, 20 353 354,84 сўм пеня ундиришингизни.
3. ЎЗР ИПКнинг 170–моддасига асосан, даъво аризасини Палата вакилининг иштирокисиз кўриб чиқишингизни.
4. Давлат божи ва бошқа суд ҳаражатларини жавобгар ҳисобидан ундиришингизни.

Илова:

1. «Pronto Textile Group» ҚК МЧЖ Ўзбекистон Республикаси Савдо-саноат палатасининг аъзоси эканлиги ҳақида гувоҳнома нусхаси;
2. Даъво аризасининг кўчирма нусхаси ва унга иловаларнинг жавобгарларга юборилганлигини тасдиқловчи ҳужжат;
3. Тарафлар ўртасида имзоланган шартнома нусхаси;
4. Ҳисобварақ-фактуралар нусхаси;
5. «Business Tex» МЧЖга юборилган талабнома нусхаси;
6. Почта харажати тўланганлигини тасдиқловчи квитанция;
7. Д.К.Курбанов номига расмийлаштирилган ишончнома нусхаси.

**Раиснинг  
биринчи ўринбосари**



**Д.К.Курбанов**